

欽定平定教匪紀略

欽定平定教匪紀畧卷三十五

二月初八日紀巡視東漕給事中李鴻賓奏言
竊查上年三省匪徒勾結滋事仰賴

聖主洪福將士宣力迅速剿除惟三省毗連地方饑
民難民餘匪土匪急須設法拯救並搜捕淨盡
以臻治平臣留心察訪酌擬善後事宜數條敬
爲我

金匱要略卷三十五
皇上陳之一籌濟民食查直隸河南山東三省被災
被賊地方各督撫等節經奉

旨查辦業已分給銀米並將錢粥兼施惟各該處糧
價倍常負販不至縱領官錢無從乞米卽各處
分置粥廠而設立無多民居寫遠老弱臥病枵
腹餘生不能赴食聞粥廠中有匍匐而來未得
食而先斃者此以民就廠不如以廠就民也現

在直隸大名山東曹州情形大概相同而河南
滑濬中牟睢鄭祥符考城寧陵各州縣爲尤甚
統祈

勅下各督撫妥協經理於酌放錢米外察看鄉市村
莊遠近多爲分置粥廠以便饑黎就食至散賑
地方旣廣爲時又久其米粟自應多爲籌備如
本境鄰境有募義紳民力能助賑者應聽其呈

報地方官設廠煮賑且三省各屬多係積歉應各於近省豐熟地方遣員速爲採買以資接濟一查禁地窰查奸匪於平地掘坎橫通直達或數丈至數十丈不等名曰地窰始於直隸之鉅鹿山東之鄆城二縣而三省毗連各州縣亦往往而有該匪等始則窩藏賭博容留姦盜後遂招集兇橫演練器械凡傳徒習教夜聚曉散之

黨多潛匿其中其地窖上覆土屋環植菜蔬外
復築以圍牆雖近通衢過者莫察現雖逆黨剿
除而餘匪土賊竄伏此中者聞尙不免應請

勅下各督撫嚴飭各地方官認真訪查遍將地窖毀
平絕其巢穴並出示嚴行禁止及曉諭軍民人
等訪實出首以杜隱患一嚴禁私渡查渡口船
隻官設者爲官渡民置者爲私渡原皆可以盤

緝匪徒若徒嚴官渡而不禁私渡官渡查人過
嚴則難民被其攔阻私渡索錢必多而奸民得
以賣放是查賊者適以縱賊便民者轉以殃民
也臣聞三省沿河地方現飭官渡稽查而私渡
仍不免有疎漏之弊河南睢寧二境黃河口門
以外在在有之其地與滑濬曹定等縣接壤私
渡旣多惟知乘機籠利逃匪率由此西渡遠颺

而窮黎轉不能東渡回籍以至壩上棚民因遭
禁渡路斃日多此明嚴官渡暗縱私渡之弊也
應請

勅諭地方大吏委員於各渡口查有形跡可疑及攜
帶違礙字跡器具者無難立即盤獲其有文憑
護票及附近民人蹤跡分明者概不查搜惟嚴
禁一切私渡毋許放行並將官渡酌定船戶飯

錢刻榜懸示或地當孔道卽多置一二官船以利往來一仿行會哨查軍務告竣三省調集各處兵丁業經分別撤回現在三省連界地方如河南睢寧考城一帶饑民叢集卽多奸徒涸跡其中而山東曹單定陶金鄉等縣教匪亦尙多餘黨仍須認真查緝顧撤兵無以資彈壓而留兵亦恐耗資糧臣查兵部則例有江海會哨之

條各營汛上下往來巡緝每月彼此會哨二次
對換概將令箭爲憑今擬仿照此例畧爲變通
此數處酌計營汛在百里內外按程一二日可
到者各派將備領兵數百名彼此對換以印單
開列各兵姓名並給腰牌查對每月二次屆期
相爲輪轉順途巡緝到營後仍如各歸其伍無
庸增給口糧旣省糜費又壯聲威一俟農穀豐

收人心大靖卽爲停止以上四條於善後事宜
似可稍備採擇伏乞

訓示奏入

上諭內閣曰給事中李鴻賓條奏三省善後事宜一
摺所言切中時弊皆應速辦上年直隸豫東三省
交界奸民滋事皆由林清首倡逆謀滔天之罪寸
磔不足蔽辜其從逆徒黨亦皆被其煽惑罹刑網

伏誅夷者殆以萬計而良民受其荼毒因而戕生
蕩析者更不可勝數朕思之實爲憫惻三省連年
本多荒歉茲又加以兵燹間閭凋瘵若再不盡心
撫字其何以拯救黎元前屢頒諭旨令該督撫等
加意賑卹分給銀米并於各處多設粥廠俾道路
饑民咸資餬口今據該給事中奏稱粥廠雖設而
民居寫遠老弱臥病枵腹餘生不能赴食并有匍

匍而來未得食而先斃者殊堪憫惻直隸大名山東曹州情形相同而河南滑濬中牟睢鄭祥符考城寧陵各州縣爲尤甚夫以民就厰何如以厰就民此時亟應多爲籌備米粟酌量村莊遠近添設粥厰或本境米糧稀少卽就近於豐熟地方廣爲採買督撫大吏下及有司皆有爲朕牧民之責伊等動輒以捐廉辦公爲請朕多不允納若仰體朕

保赤之誠以俸入所餘倡先施濟使地方富戶紳民共知則倣能令災民多所全活其所濟者大矣又所奏查禁地窖一節上棟下宇廬舍市廛各有恒式今奸民等創爲地窖爲鬼爲蜮小而窩藏奸賭大而聚匿兇徒皆倚以爲巢穴不可不嚴行查禁著三省督撫卽分飭地方官訪明現有巢窟令其自行毀除若不毀除或經官查出或被入告發

以違制論並出示曉諭毋許再有私造以杜隱匿
又所奏嚴禁私渡一條據稱官渡因查人過嚴難
民致被攔阻而私渡得錢賣放奸民轉可偷渡三
省沿河地方及河南睢寧二境黃河口門以下比
比皆是壩上棚民因禁渡路斃日多等語渡口盤
詰奸宄若因此稽留難民爲暴商旅是防弊而適
以滋弊著該督撫分派委員於官渡私渡一體留

心查察如有形跡可疑及帶有違礙字跡器具者
卽行查緝其勒索錢文苦累平民賣脫奸宄者查
出從重懲治毋稍姑息又所奏派兵會哨一事搜
捕餘匪彈壓地方防兵不能曠日久駐該給事中
奏請仿江海會哨之條藉以察勘營汛稽查匪黨
是亦弭患之道但每月二次亦未免太數應如何
按計營汛程途遠近撥派弁兵輪流巡緝俾居民

無擾奸匪潛蹤著直隸河南山東督撫酌議章程
妥協辦理

同日方受疇奏言查上年滑縣逆匪勾結滋事
調集各路官兵尅期剿捕事機萬分喫緊其時
河北一帶正值積歉災傷凡採辦軍需一切倍
常昂貴其官兵鹽糧馬乾採買粟米等款例價
實屬不敷臣已奏蒙

恩准據實報銷在案現在軍務告竣經臣飭令兩局

司道將動用各款開單彙送覆加查核自軍興

起至凱旋官兵出境止除山陝二省協濟驛馬

火藥火繩各價應歸該二省自行開銷又各州

縣採辦軍需物料僱備車船支應兵差等銀尙

未全領外統計司庫已撥發銀一百六十餘萬

兩內有各官借支養廉兵丁借領行裝銀七萬

餘兩應按季扣還歸款其餘銀兩現在催令經手各員核實造報將例應准銷銀兩確核

題銷其鄉勇口糧及例價不敷並例不准銷等款應仍照川楚軍需成案由豫省攤捐歸款此內如有不照例案濫支濫應者卽著落經辦之員賠繳庶帑項支銷悉歸核實奏入報

聞

二月初九日庚子方受疇奏言上年滑縣匪徒滋

事界連直隸山東又與省城切近道路綿長防

堵稽查均關緊要兼以集九省之兵閱四月之

久一切軍火糧餉製備器具等項必得隨時應

付方免貽悞地方正佐以及投効各員或防守

城池堵禦要隘或緝匪解犯照料兵差均能始

終奮勉臣謹擇其尤爲出力者繕列清單敬呈

御覽再豫省隨營武職各員業經那彥成等分別保奏尙有歸德營叅將得志防守城池巡緝匪犯甚爲出力鄧新營遊擊楊景芬派在北岸封邱一帶堵禦毫無疎懈該二員先會蒙

恩賞戴花翎應懇

聖恩給予議敘又陳州營都司汪鳳臨經臣派令帶兵防堵在北岸爪子營地方突遇賊匪一千人

竄至該都司率領弁兵一百名奮勇追剿殲獲
賊匪多名卽在考成防守匪徒不敢復生窺伺
考城蘭陽一帶得獲安全應請

賞戴花翎又襄城營都司全保歸德營守備董元壯
千總李京陽把總張飛鼎等四員防堵要隘緝
拏匪犯均屬奮勉應請

賞戴藍翎並有前在濬縣城外隨同打仗搜獲滑縣

印信之馬兵李復元亦屬出力應請以把總外
委酌量陞用奏入

上諭內閣曰方受疇奏查明承辦軍務出力人員懇
恩獎勵一摺上年滑縣匪徒滋事該員等或防守
城池或經理糧餉以及各項差委均能奮勉勤事
加恩著照所請河北道趙麟賞加按察使銜開封
府知府昌宜泰賞加道銜知州借補祥符縣知縣

王祁睢州知州汪如潮以同知直隸州陞用懷慶
府通判候選直隸州知州李義文安陽縣知縣章
玉森洛陽縣知縣魏襄俱賞換五品頂戴河內縣
知縣吳爲義商邱縣知縣錢熙孟縣知縣孫世澧
封邱縣知縣全福滑縣巡檢秦丙正陽縣典史張
熾淇縣典史錢震西平縣典史季岑俱以應陞之
缺陞用汲縣知縣劉廣澍西華縣知縣殷長福新

安縣知縣趙鼎無論題調缺出准其調補候補通
判竹騰霄候補知州吳廷標候補知縣華宗壇周
南王渭黃堂貴泰無論繁簡陞調所遺並丁憂等
項缺出俱准其酌量補用同知銜坐補懷慶府通
判李璧免其坐補俟補缺後給咨引見試用知縣
裴奉辰俟服滿後准其留於豫省補用候補縣丞
管景輅候選未入流余鼎准其捐足不論雙單分

發留於豫省委用原發廣東從九品沈樹信候選
禾入流莊尙忠俱准其留豫委用其辦理兵差驛
站之道員張翺候補道吳紹浣知府謝學崇袁繼
綱齊鯤候補知府鍾祿直隸州知州耿育仁通判
候補同知直隸州潘鷺知縣郝延年陳藻鄭丞烈
孫肅元李虎臣章慶廉王掌絲並著交部議敘

上又諭內閣曰方受疇奏軍營出力之武弁懇加鼓

勵等語歸德營叅將得志鄧新營遊擊楊景芬防
守城池巡緝口岸毫無疎懈該二員前已賞戴花
翎著加恩再交部議敘陳州營都司汪鳳臨防堵
河岸剿禦出力著加恩賞戴花翎襄城營都司全
保歸德營守備董元壯千總李京陽把總張龍鼎
隨營奮勉俱著加恩賞戴藍翎其在濬縣隨同打
仗搜獲滑縣印信之馬兵李復元著該撫以把總

外委酌量陞用

二月初十日

辛丑賽冲阿楊遇春奏言查綠號股

匪經

臣賽冲阿在店子河寨家山等處痛剿雖

已斬擒大半獨逆首苗小一率四五百人遠遁

老林

臣賽冲阿卽挑選官兵五百名派令遊擊

余步雲等帶領跟追裹帶乾糧星夜前進復又

飛札吳廷剛探蹤抄截

臣賽冲阿亦卽率兵繼

進行抵茅坪接據吳廷剛稟稱接奉札飭卽督
率叅將張起鰲守備唐倬劉太帶兵五百名連
夜進剿又令遊擊周貴等帶兵四百名由亮風
垭一帶抄截二十九日寅刻行至月亮坪地方
該匪正在喘息官兵直前撲殺匪徒膽敢放鎗
持械抵死抗拒適臣賽冲阿所遣遊擊余步雲
守備張必祿冉玉龍千總李應龍楊英把總王

雄英等帶兵趕到協力剿殺斃賊七八十名生擒七十一名內有賊目李大旗何貴二名訊據供稱我們頭子僞元帥苗小一今早臨陣已被官兵殺死是衆人親見的我們因官兵追趕緊迫都在沿途逃散昨日到代古坪查點人數只餘三百有零今日又被官兵擒殺多人現在逃出多少我們實不知道等供查此股匪徒除擒

斬外所餘不過百人已四散逃匿現在分兵搜捕並飭弁兵帶同何貴于山坎下尋出苗小一屍身令現獲活賊隔別辨認屬實臣賽冲阿卽飭將苗小一首級懸掛示衆以快人心併將解到活賊訊明分別凌遲正法此次陣亡兵丁二名受傷弁兵十一員名另行造冊咨部臣賽冲阿所剿四號匪徒已全行辦竣現在馳赴華陽

督率搜捕零匪適臣楊遇春趕辦龔貴股匪追

至牛尾河該匪徒望風潰散僅存四五百人由

獅子嶺礮房溝一路竄遁老林正在催兵追殺

據報苗小一股匪被臣賽冲阿逼竄漢江北岸

有欲走二郎壩竄入南山老林之勢當酌派馬

步官兵一千名令副將何占鰲等帶領專辦龔

貴一股殘匪臣楊遇春親率官兵抄出二郎壩

截剿苗小一股匪嗣復探得該匪在店子河寨

家山等處剿敗由西溝竄女兒壩隨派令副將

銜齊慎帶兵由都督河佛爺坪迎頭攔截臣楊

遇春帶領馬隊由華陽取道二十四壩探蹤抄

截及行至華陽已經臣賽沖阿督率吳廷剛等

將苗小一首夥駢誅督兵搜洗餘孽亦到華陽

彼此會晤籌商各路剿捕事宜適據鳳縣文武

稟報龔貴殘匪晝夜狂奔已竄至寶雞縣屬南安溝水蒿川一帶有由東河橋竄至棧西之勢

臣等隨飛調派出齊慎一路官兵趕緊回歸臣

楊遇春帶兵由小河口桅桿石武關河一帶取

道入棧確探賊蹤迎截並據楊芳游棟雲報稱

吳抓抓吳瘋子等股匪已經該鎮剿辦完竣另

股七八百人奔竄竹壩子一帶現在帶兵進剿

該鎮等兵力甚厚無難剋日掃除現在各股竄
匪次第剿滅督臣長齡亦由子午峪前赴漢南
一帶臣等俟與長齡會晤將各路官兵應留應
撤之處妥議章程再行會銜馳

奏再臣等續接副將銜齊慎稟稱奉派帶兵攔剿
苗小一零匪卽由古枝梁一路進發探得此股
已經吳廷剛余步雲兩路夾擊殲擒大半剩匪

約有百餘人由亮風垵老林竄出菜子灘奔茨
溝太白老林該副將卽由佛爺坪分兵兜剿將
所有殘匪悉數殲擒並無一名漏網查綠號零
匪旣經掃除淨盡漢江南北實已全境肅清惟
前據青號逆首楊榮供稱匪徒共有青藍紅綠
黃五號今青藍紅綠四號均已辦完獨黃號不
知下落因遍詢活賊李順等供稱陳四一股便

是黃號陳四是僞元帥段總兵是僞先鋒帶領
衆人獨走一路不與四號合夥等供據此是五
號匪徒均已掃除淨盡此外並無餘孽奏入

上命軍機大臣傳諭賽冲阿長齡楊遇春朱勲曰賽
冲阿等奏剿除青藍紅綠四號股匪將首逆苗小
一殲斃一摺此數股賊匪剿淨之後川省邊界已
就肅清惟龔貴殘匪數百人在寶雞東河橋一帶

奔竄楊遇春已馳往剿辦其吳抓抓等股匪業經
楊芳游棟雲剿辦完竣有另股賊匪七八百人奔
竄竹壩子該鎮等星馳追剿以得勝之師乘殘敗
之賊諒可尅日殄除此外尙有長齡前奏竄往隴
州不知姓名賊匪千餘人該督自行帶兵往剿曾
否追及掃除此時長齡與賽冲阿楊遇春軍營相
距均不甚遠伊等各將所辦之賊追殺淨盡即可

以次會合看來歲事捷音必能符前二月之限惟
大股賊匪剿除之後必當將山內山外及附近棧
道零星竄匪搜捕淨盡伊等會勘實無遺孽卽由
六百里加緊奏報歲功總於迅速之中倍加慎重
勿留遺孽捷音一至竚沛恩施

上諭內閣曰賽冲阿等奏剿辦青藍紅綠四號股匪
節次掃除現復殲斃綠號逆首僞元帥苗小一首

夥淨盡一摺據稱官兵前在店子河等處痛剿賊
匪之後逆首苗小一當率四五百人潛遁老林該
將軍一面派兵窮追一面飛札吳廷剛派兵抄截
前月二十九日吳廷剛所派官兵進至月亮坪地
方正在剿殺間適賽沖阿所派官兵趕到協力痛
剿殲獲賊目賊匪多名當將苗小一臨陣殲斃訊
據活賊認出屍身梟首示衆現在掃除淨盡苗小

一等各號股匪前此裹脅至四千餘人在陝省蓋
厓城固洋縣西鄉等處肆行焚掠並踰淺渡江窺
伺川境賽冲阿原在沔縣防堵一經得信飛卽移
兵剿辦奮勇窮追不予賊匪片刻之暇計一旬之
內師行二千餘里連接五仗將各號數千匪徒殲
擒淨盡首夥無一漏網所辦可嘉之至賽冲阿前
因剿辦三省邪匪曾給一等輕車都尉世職茲保

障西南厥功甚偉著加恩晉封爲二等男以昭懋
賞所有出力將弁官兵卽著該將軍秉公查明據
實保奏候旨陞賞

同日章煦奏言竊查南河縣拏獲逆犯楊遇山

一案應提各犯現據河南撫

臣將邵坦照咨解

來直併據清河等縣先後拏獲逆犯劉功等解

省臣逐加研鞫緣楊遇山向習離卦教嘉慶十

一年曾在劉功處會見離卦教首邵生文之孫
邵坦照遂與往來送給銀兩並傳徒劉文明劉
存信等犯十八年四月內滑縣逆匪于克敬至
楊遇山村內行醫詢係同教于克敬遂邀同楊
遇山并宋洛平呂金臺至宛平縣宋家莊與林
清會面林清言九月內應有刼數伊已勾結獨
石口武官曹姓太監高幅祿並約同教之人定

期四五月三五日一齊起事暗藏九月十五之
期林清當給楊遇山信一封囑其送交滑縣李
文成收閱楊遇山卽攜書先至曹縣同教人徐
先及東明縣羅文志棗林兒王道瀝各家互相
知會於六月二十六日始同張奎五劉文彩自
劉文明家起身至李文成家送信又與劉惲明
相見而回八月初一日楊遇山復雇張得富背

負行李同張奎五往與李文成劉惲明密謀李文成等令其糾黨接應楊遇山回至劉文明家糾齊劉存信和隨路祥雲霍景有劉文彩劉文炳劉玉全張奎五等八人楊遇山欲給李文成等回信并欲知會商邱縣郃坦照及素好之清河縣張希勝預備白旗保護身家令霍景有寫信遣張奎五送赴滑縣李文成等未給回書惟

囑令告知楊遇山多糾夥黨接應又令劉存信
送信至部坦照家告知來意部坦照畏懼將信
焚燬其所寄張希勝信函囑張奎五轉交素識
之李添成送往李添成因工忙將信燒燬未送
楊遇山以李文成等既令招人接應必須備造
名冊令閭三俊繕寫十家牌式樣一張又令張
作楫編造招軍告示二稿卽寫於十家牌稿背

後存留閭士興家時滑縣業已起事楊遇山因
夥黨僅止同教數人未能往助適被林清指供
奉

旨飭拏並訪獲劉文明等犯訊據供認不諱楊遇山
霍景有張作楫三犯均應依律凌遲處死劉文
明劉存信和隨路祥雲劉文彩劉文炳劉玉全
張奎五閭士興閭三俊等十犯均應擬斬立決

梟示臣於審明後卽恭請

王命將該犯等綁赴市曹分別凌遲斬決梟示內霍
景有張作楫劉文明劉存信和隨路祥雲劉玉
全均已在監病故仍照例戮屍傳首示衆各犯
家屬查明照例緣坐卽坦照之祖卽生文係屬
離卦教首該犯於卽生文犯案正法之後猶敢
踵習其教收受同教人餽送雖訊無傳徒及與

楊遇山等商同謀逆情事係著名教首之孫未
便容留內地致滋事端卽坦照應與曾拜楊遇
山爲師之谷自孝潛與教匪往來之吳生智均
照例發往新疆給額魯特爲奴劉功訊未從逆
現准山東咨會尙有另案待質應解東省歸案
辦理餘犯杖責擬結奏入得

旨刑部議奏旋經刑部照所擬奏結得

旨依議部坦照著發往新疆給額魯特爲奴遇赦不赦

章煦又奏言竊照從逆匪犯馬老太供扳何凱

等知情同謀一案經

臣

等節次審訊據馬老太

供認曾拜林清爲師十八年七月間林清告知

逆謀及造反日期令其糾人俟滑縣衆人至保

定攻城時在內接應馬老太當卽應允嗣因省

城各衙門耳目甚近稽查嚴密糾人恐致敗露
未敢舉動迨九月半後馬老太聞知林清被拏
心生畏懼十月內不記日期馬老太與所雇幫
工之發遣旗人岳克清阿民人劉均相飲酒馬
老太醉後悲嘆聲言事已散臺岳克清阿盤問
馬老太將林清糾合從逆之言告知岳克清阿
等當斥其非次日馬老太酒醒自知失言隨向

岳克清阿等央懇始各容隱嗣因宋玉林在京
供出馬老太從逆拏獲解京審訊馬老太已供
認聽從林清入教謀逆復追究夥黨馬老太慮
恐受刑因與何凱張老得施美儀周幅靈王孝
禮袁五蘇老二卽蘇蔭子王喜李老達等俱各
挾有微嫌卽將何凱等扳供奉

旨飭拏究辦並派令刑部郎中汪如淵押解馬老太

來省質究何凱等九人實係馬老太挾嫌誣扳
並未入教從逆馬老太應依律凌遲處死臣遵
旨於審明後卽恭請

王命將該犯綁赴市曹凌遲處死仍梟首示衆其妻
趙氏照例緣坐岳克清阿等及案內餘犯分別
問擬遣徒枷杖完結奏入得

旨刑部議奏旋經刑部照所擬議結

上從之

二月十一日

壬寅

長齡楊遇春朱勲奏言竊查吳

抓抓股匪人數衆多先經

臣

等剿辦鐵鑑川滋

擾股匪內訊據活賊供稱吳抓抓逃赴隴州此

股係吳奇譚貴爲首嗣因該匪等竄擾沔縣焚

燒關廟總兵楊芳帶兵馳往

臣

等卽令該總兵

於剿辦之時詳查吳抓抓是否在內務期拏獲

茲據楊芳稟稱探得賊匪已南竄黃官嶺其勢
直奔入川之路該鎮卽督催官兵連夜行走於
二十五日黎明趕至翦子河地方截住賊匪去
路分兵設伏親率馬隊迎頭進擊賊匪三千餘
人正在黃官嶺集隊起竄一見官兵紛紛搶占
山梁搖旗下壓經副都統銜達斯呼爾岱金保
侍衛金勤保色楞保妥協領永海帶領吉林索

倫馬隊遊擊萬彪都司沙武德守備馬得陞千
總張貴福帶領步隊官兵奮勇分撲越二時之
久斃賊五百餘名賊始潰亂撲過山溪冀圖免
脫楊芳等且殺且追又斃賊三百餘名賊衆竄
越山澗直趨塘口子正遇設伏之都司劉安邦
劉允孝李章守備鍾虎翀等帶領官兵據山下
壓立時殺賊二百餘名賊復折回奔竄馬步官

兵合力緊追復遇設伏之叅將銜遊擊呂天俸
遊擊方一彪中福知縣劉國柱帶領兵勇由老
林橫截衝出該匪情急與我兵刀矛相接剿殺
一處該鎮親率馬隊前後衝擊適游棟雲率同
遊擊林向榮等帶兵趕到四面圍剿殺斃賊匪
五百餘名該鎮見賊衆中有戴紅頂藍頂者各
一人持旗指揮勢甚兇猛訊問活賊知一係吳

抓抓一係吳瘋子卽吳奇該鎮傳令弁兵務須
先剿二逆有西安步兵李信衝入賊隊將紅頂
賊匪用矛迎胸戳落墜馬把總陶英前往撲擒
賊衆刀矛並舉直前救護經吉林甲兵穆騰額
鄂克敦保索倫藍翎額外驍騎校達布欣額等
殺斃多賊始砍獲該逆首級並手一隻其吳瘋
子卽吳奇一犯仍復死力抵敵經侍衛金勤保

索倫委叅領舒明阿知縣劉國柱率領壯勇馮
貴藍翎馬兵林懷玉刀矛砍戮落馬隨割取首
級又據河州外委趙祿馬兵杜得伏生擒戴頂
賊匪一名訊係僞元帥王占魁壯勇劉文富砍
斃戴頂賊匪一名認係僞總兵王鳳西其餘執
旗賊目殲斃無數尙有自割髮辮扒山及竄匿
林箐賊匪七百餘名全行搜獲計奪獲大礮二

十八尊鳥鎗一百八十七桿刀矛二千三百二十餘件大小旗八十三面騾馬四百餘頭匹救出男婦三百七名口割取耳記一千七百五十六副隨於割獲首級內令活賊認出僞先鋒三名大小旗手二十餘名訊出從賊日久曾充小旗手及戰手五百十二名均卽概予正法其餘被裹男婦有人結保者概行釋放吳孤孤首級

並手一隻及僞元帥王占魁起解候訊該鎮嚴
訊犯供有吳孤孤股內分出之張占鰲帶領七
百餘人先已由沔縣另竄並有譚貴在內現在
分兵跟蹤剿辦臣等查吳孤孤以幼年左手被
火燒傷殘廢遂號吳孤孤與吳奇譚貴合夥前
因犯供該逆逃赴隴州不知下落臣等正深憤
恨今仰仗

皇上天威將該逆股匪大加殲戮不致入川賊首二
名皆已殲斃實足痛快人心其分出小股之張
占鰲等七百餘人已飭楊芳等跟蹤進剿至龔
貴股匪自楊芳剿散後竄入老林該處山徑逼
仄深林密箐馬隊不能行走臣楊遇春派令副
將何占鰲帶領步隊官兵入林搜剿臣楊遇春
親帶馬步官兵在華陽一帶適中之地接應並

就近搜拏各路剿散零星匪現在該匪又分股逃

竄寶隴一帶

臣

長齡接據稟報因未知是否係

龔貴一股卽由斜峪關馳赴安平溝地方據探

報實係龔貴分股共有八九百人已竄入黑河

老林

臣

長齡卽派總兵特依順保帶領官兵由

西向東步行入林搜捕

臣

長齡帶領馬隊官兵

於寶隴一帶相機截剿至前次拏獲之逆首陳

四已據祝廷彪委員解到臣等親提嚴訊後卽將該逆凌遲處死派員執持首級赴三才峽一帶傳示以彰

國法再查此次賊匪滋事多係川楚游棍藉歲歉爲名勾結山中匪徒隨處擄掠與從前教匪有間其旗幟各色皆係搶獲綢布隨意造作祇有大小旗手之分並不以旗色爲號故一股內旗

幟卽有五色

臣

等疊次剿淨各股所奪大小各

旗現均存貯顏色錯雜不一所有賽冲阿訊出

賊供五色旗號之處或係該犯楊榮股內記號

以此分認隊伍查從前楊二投首未曾供出五

號分起之事卽現在擒獲之陳四訊問亦不知

苗小一之名緣賊匪頭目係賊衆公舉往往一

言不合卽殺斃另立其分出之股又另立頭目

卽賊匪中亦不能徧識臣等惟有督飭鎮將遇
賊卽剿務將一股全行殲斃方爲辦竣其旗幟
顏色似不足憑信尤九一犯前據獲賊供稱因
與王大旗分糧食衣物不均致被戮斃今賽冲
阿訊據楊榮供稱因尤九搶奪婦女伊令手下
人殺斃供情雖有不同其爲業經殺斃無疑此
等著名首逆臣等惟當悉心查訊務求實據斷

金匱要略卷三十三
不敢稍有錯誤致該逆倖逃法網奏入

上命軍機大臣傳諭長齡楊遇春朱勲曰長齡等奏
剿滅吳抓抓股匪並將首逆吳抓抓吳奇殲斃現
在各股賊匪次第掃除惟剩有張占鰲小股七百
餘人由沔縣旁竄譚貴亦在其內楊芳等已乘勝
追剿諒可卽日辦竣其龔貴股匪竄入黑河老林
賊夥不過八九百人若在地不難一戰殄除今

老林內灌木叢雜兵力不能施展長齡楊遇春各
派總兵特依順保副將何占鰲分帶弁兵步行入
林搜剿該匪等因獸猶闕潛伏叢莽之中若乘官
兵不備戕害將士卽兵丁稍有傷損已屬不值若
得力將弁更當慎重保全此等殘敗之賊卽譚貴
龔貴等均不須按名生擒但將首夥殲斃卽可竣
事與其冒險搜林不如用火焚燒或鎗礮轟擊乘

其竄出之時扼要堵截聚而殲旃較爲妥善長齡
等相機辦理勿遲滯亦勿冒昧此二股賊匪共計
祇有一千五六百人卽日辦淨查勘各處實無遺
孽長齡等卽會同賽冲阿由六百里加緊馳報捷
音佇膺懋賞

上諭內閣曰長齡等奏剿滅吳抓抓股匪並殲斃首
逆吳抓抓吳奇一摺吳抓抓吳奇股匪前擾及沔

縣焚燒關廂並欲率衆由黃官嶺南竄入川經楊
芳帶兵馳赴翦子河地方攔截去路沿途設伏以
待該鎮親督馬步官兵分路攻撲越二時之久賊
始潰亂官兵且剿且追各路伏兵皆起適總兵游
棟雲帶兵亦至賊匪無路可逃四面剿殺立將首
逆吳抓抓吳奇二人臨陣殲斃並殲斃賊匪一千
五百餘人生擒旗手及戰手等五百餘名均予正

法所辦可嘉楊芳游棟雲辦賊奮勉均著加恩交
部照軍功例從優議敘其殲斃首逆吳孤孤及吳
奇之員弁兵勇俱加恩超陞以示鼓勵把總陶英
著以守備陞用馬兵林懷玉步兵李信俱著以把
總拔補壯勇馮貴著入伍食糧以外委拔補其侍
衛金勤保委叅領舒明阿知縣劉國柱驍騎校達
布欣額甲兵穆騰額鄂克敦保均著長齡查明以

應陞之缺保奏此外出力將弁兵丁並著秉公查
明據實奏聞候旨陞賞